

駱

丞

集

附辨譌
攷異

張燕公集目錄

卷一

賦五首

詩三十四首

卷二

詩五十六首

卷三

詩六十七首

卷四

詩八十首

卷五

詩九十三首

卷六

頌二十三首

卷七

頌四首

卷八

贊十九首

箴三首

銘五首
記一首

卷九

表二十四首

卷十

表二十一首

卷十一

疏二首

狀七首

對策三首

批答一首

卷十二

序十一首

卷十三

啓一首

書二首

露布一首

卷十四

碑銘七首

卷十五

碑銘三首

卷十六

碑銘五首

卷十七

碑銘六首

卷十八

碑銘六首

卷十九

碑銘四首

卷二十

碑銘四首

卷二十一

碑銘八首

卷二十二

墓誌銘九首

卷二十三

墓誌銘十一首

卷二十四

墓誌銘六首

卷二十五

祭文十九首

行狀一首

張燕公集卷一

唐 張 說 撰

賦

喜雨賦應制

史臣啓先王之冊府。校絕瑞於祥經。樂雲雨之平施。齊品物之流形。皇帝益重而爲寶。麟鳳自輕而讓靈。況愆時而渴望。欲意達而神聽。是月也。朱明漸半。紫油未吐。恐降災兮。此下人。罄虔祈兮。我仁主。退象龍之禮禱。斥持鷺之貌舞。屏翳慙其廢職。祝融悔其遷怒。山決澇而出雲。天霧霽而下雨。速一言而感應。尅三日而周溥。氣翕靄以駢黠。聲颯灑以蕭條。瓘如銀漢之屑落。燦似珠泉之噴澆。街鄽漫其潢潦。臯壤萎其綠苗。舒四溟之清潤。卷六合之煩囂。咸澡骨於神液。共歡心於聖朝。借如五月有梅雨之名。三春有穀雨之氣。越人以泥牛待沃。胡士賣土龍求費。出員嶠而石香入。成都而酒味。彼偏方與小節。非大人之所貴。復有送山祇於鬱島。迎海若於葛川。疾雷碎其山裂。走電煜其海燃。天子作愁霖之賦。詞人綴苦雨之篇。牆屋壞於倒井。黍稷沉於下田。乃凶禋之不令。曷休徵之有焉。請言瑞雨之可喜也。協氣交泰。嘉生是賴。湛覃而不溺。衍溢而不害。東漸出日之表。西被無雷之外。南窮火鼠之譯。北盡燭龍之會。天文則雲漢昭回。王澤則江河滂沛。雖欲談天而窺管。孰知堯德之爲大。

進白鳥賦

咨大鈞之播氣。在品物而流形。有莫黑之凡族。亦變白而効靈。感上仁於孝道。合中瑞於祥經。若夫事出神妙。理包舒卷。睨集王室。飛隨帝輦。捧日高翥。迎風細轉。識句句於招呼。每啞啞於啄吮。以其霜羽雪毛。冰精玉狀。拔奇綠林之下。賞異紫臺之上。瞰鳩鵲之妙牕。抱鳳凰之衣桁。恐同類之見嫉。畏不才之速謗。願悉命於渥恩。豈顧私於閒放。維聖君之靈囿。物何遠而不臻。有能言而可重。或善舞而取珍。羞陋軀而入獻。與寶羽而爲隣。探朝噪之聲樂。眷夜啼之曲新。無芒距以耀武。不鉤觜以懷仁。謝先容而特達。却假飾以全真。鑒深心於反哺。移報德於君親。

虛室賦

明月窗前。古樹簷邊。無北堂之樽酒。絕南鄰之管絃。理涉虛趣。心階靜緣。室惟生白。人則思元。厭百慮之勞止。歸一途之兀然。嗟乎。巧智首亂。禮樂增矯。名起異端。利成貪兆。役二見之交戰。驅五神而雜擾。形何費而不衰。性何煩而不夭。每竭源而追末。必亡多而獲少。玉帳瓊宮。圖侈務豐。朱門金穴。恃滿矜隆。榮與辱而俱盛。事隨憂而不窮。陷營爲之桎梏。留健羨之池籠。心元是幻。法本皆空。莫不因無證實。假異生同。魚何知而樂水。蛇何意而憐風。大哉默識。守此元通。顧瞻天下。還如夢中。

江上愁心賦寄趙子

江上之峻山兮。鬱崎嶇而不極。雲爲峯兮。烟爲色。歛變態兮。心不識。江上之深林兮。杳冥濛而不已。鳥爲花兮。猿爲子。紛盪漾兮。言莫擬。夏雲陰兮。若山。秋水平兮。若天。冬沙飛兮。淅淅。春草靡兮。芊芊。感四節之

默運知萬化之潛遷。伴衆鳥兮寒渚。望孤帆兮日邊。雖欲貫愁腸於巧筆。紡離夢於哀絃。是心也。非模放之所逮。將有言兮是然。將無言兮是然。

畏途賦

青泥路。白馬關。雲足躡。霞手攀。忠臣往兮孝子還。陟羊腸。臨鳥道。搏絕岸。援蔓草。懸梁變娜以樹接。虛閣穹崇而烟抱。風雨櫛汨兮。崩泉而險湍。圖畫詭屈兮。紅峯而碧巒。林黝黝而人靜。山巒巒而地寒。客有夢兮在城闕。背芳萱兮心不歇。憫秋草之墜露。弔窮崖之飛月。聞哀猿之一鳴。憂人宿昔兮生白髮。

詩

侍宴武三思山第應制賦得風字

梁王池館好。曉日鳳棲通。竹町羅千衛。蘭筵降兩宮。清歌芳樹下。妙舞落花中。臣覺筵中聽。還如大國風。

侍宴蘘荷亭應制

迴鑾青岳觀。帳殿紫烟峯。仙路迎三島。雲衢駐六龍。園林看化塔。壇壝識餘封。山外聞簫管。還如天上逢。

侍宴臨渭亭應制

青郊上巳艷陽年。紫禁皇遊被渭川。幸得歡娛承湛露。心同草樹樂春天。

侍宴滄水應制賦得濃字

千行發御柳。一葉下仙筇。青浦宸遊至。朱城佳氣濃。雲霞交暮色。草樹喜春容。藹藹天旗轉。清笳入九重。

桃花園馬上應制

林間艷色驕天馬。苑裏濃粧伴麗人。願逐南風飛帝席。年年含笑舞青春。

侍宴隆慶池應制

靈池月滿直城隈。黻帳天臨御路開。東沼初陽疑吐出。南山曉翠若浮來。魚龍百戲分容與。鳬鵲雙舟較汭洄。願似金堤青草馥。長承瑤水白雲盃。

奉和春日幸望春宮應制

別館芳菲上苑東。飛花澹蕩御筵紅。城臨渭水天河靜。闕對南山雨露通。繞殿流鶯凡幾樹。當溪亂蝶許多叢。春園既醉心和樂。共識皇恩造化同。

奉和登驪山矚眺應制

寒山上半空。林眺盡園中。是日巡遊處。晴光遠近同。川明分渭水。樹暗辨新豐。巖壑清音暮。天歌起大風。

奉和幸白鹿觀應制

洞府寒山曲。天遊日旰迴。披雲看石鏡。拂雪上金臺。竹磴龍驂下。松庭鶴轡來。雙童還獻藥。五色耀仙才。

扈從幸韋嗣立山莊應制二首

寒灰飛玉管。湯井駐金輿。既得方明相。還尋大隗居。懸泉珠貫下。列帳錦屏舒。騎遠林逾密。笳繁谷自虛。門旗塹複磴。殿幕裏通渠。舞鳳隨公主。雕龍賦婕妤。地幽天賞洽。酒樂御筵初。非才叨侍從。連藻愧應徐。

西京上相出扶陽東郊別業好池塘自非仁智符天賞安能日月共迴光

奉和送金城公主應制

青海和親日。潢星出降時。戎王子聳寵。漢國舅家慈。春野開離讌。雲天起別詞。空彈馬上曲。詎減鳳樓悲。

奉和同皇太子過慈恩寺應制二首

翼翼宸恩永。煌煌福地開。離光昇寶殿。宸氣繞香臺。上界旛花合。中天日月來。願君無量壽。仙藻屢徘徊。

先天應令

三陽麗景早芳辰。四序嘉園物候新。梅花百般障行路。垂柳千條暗迴津。鳥驚直爲飛風葉。魚躍都由怯岸人。惟願聖主南山壽。何愁不賞萬年春。

奉和春日出苑應制

禁林艷裔發青陽。春望逍遙出畫堂。雨洗亭臯千畝綠。風吹梅李一園香。鶴飛不去隨青管。魚躍翻來入綵航。睿賞歡承天保定。道文更覩日重光。

奉和喜雪應制

聖德與天同。封巒欲報功。詔書斯日下。靈感應時通。觸石雲呈瑞。含花雪兆豐。積如沙照月。散似麴從風。舞集仙臺上。歌流帝樂中。遙知百神喜。灑路待行宮。

奉和同劉晃喜雨應制

青氣和春雨。知從岱嶽來。行雲避師出。洒雨待車迴。厭浥塵清道。空濛柳映臺。最宜三五夜。晴月九重開。

奉和暇日遊興慶宮作應制

漢武橫汾日。周王宴鎬年。何如造區夏。復此睦親賢。巢鳳新成閣。飛龍舊躍泉。棣華譔尙在。桐葉戲仍傳。禁籞氛埃隔。平臺景物連。聖慈良有裕。王道固無偏。問俗兆人阜。觀風五教宣。獻圖開益地。張樂奏鈞天。侍酌衢樽滿。詢芻諫鼓懸。永言形友愛。萬國共周旋。

奉和觀拔河應制

今歲好拖鈎。橫街敞御樓。長繩繫日住。貫索挽河流。鬪力頻催鼓。爭都更上籌。春來百種戲。天意在宜秋。

奉和寒食作應制

寒食春過半。花濃鳥復嬌。從來禁火日。會接清明朝。鬪敵鷄殊勝。爭毬馬絕調。晴空數雲點。香樹百風搖。改木迎新燧。封田表舊燒。皇情愛嘉節。傳曲與簫韶。

奉和過寧王宅應制

進酒忘憂觀。簫韶喜降臨。帝堯敦族禮。王季友兄心。竹苑龍鳴笛。梧宮鳳繞林。大風將小雅。一字重千金。

奉和同玉真公主遊大哥山池題石壁二首

池如明鏡月華開。山學香爐雲氣來。神藻飛爲鵲鵲賦。仙聲颺出鳳凰臺。

綠竹初成苑。丹沙欲化金。乘龍與驂鳳。歌吹滿山林。爽氣凝情迴。寒光映浦深。忘憂題此觀。爲樂賞同心。

奉和賜諸州刺史應制

文明遍禹跡。綏寡達堯心。正在親人守。能令王澤深。朝廷多秀士。鎔鍊比精金。犀節同分命。熊軒各外臨。聖主賦新詩。穆若聽薰琴。先言教爲本。次言則是欽。三時農不奪。午夜犬無侵。願使天宇內。品物遂浮沉。寄情羣飛鶴。千里一揚音。共躡華胥夢。襲黃安足尋。

奉和賜崔日知應制

聖情留曩鎮。佳氣翊興王。增戟雄都府。高車轉太常。川橫八諫闕。山帶五龍長。連帥初恩命。天人舊紀綱。餞塗飛御藻。闔境自生光。明主徵循吏。何年下鳳凰。

奉和送王峻巡邊應制

六月歌周雅。三邊諗夏卿。欲施攻戰法。先作簡稽行。禮樂知謀帥。春秋識用兵。一勞堪定國。萬里卽長城。策有和戎利。威傳破虜名。軍前雨灑道。樓上月臨營。別藻瑤華降。同衣錦褱榮。關山由義近。戈甲爲恩輕。絲竹路傍散。風雲馬上生。朝廷謂吉甫。邦國望君平。

奉和送宇文融安輯戶口應制

至德臨天下。勞情遍九圍。念茲人爲本。蓬轉將何依。外避征戍數。內傷親黨稀。嗟不逢明盛。胡能照隱微。栢臺簡竹李。蘭殿賜朝衣。別曲動秋風。恩令生春輝。使出四海安。詔下萬心歸。忤非夔龍佐。徒歌鴻鴈飛。

奉和春中興慶宮酺宴應制

千齡逢啓聖。萬域共來威。慶接郊禋後。酺承農事稀。御樓橫廣路。天樂下重闈。鸞鳳調歌曲。虹霓動舞衣。合聲雲上聚。連步月中歸。物覩恩無外。神和道入微。鎬京陪樂飲。栢殿奉文飛。徒竭秋螢影。何資春日暉。春晚侍宴麗正殿探得開字

奉和花萼樓下宴應制

萬心翹樂宴。三舍緩昌時。山接夏雲險。臺留春日遲。節移芳未歇。興隔賞仍追。醉後傳嘉惠。樓前舞聖慈。皇恩與時合。天意若人期。故發前旬雨。新垂湛露詩。

端午日三殿侍宴應制探得魚字

小暑夏絃應。微陰商管初。願齊長命縷。來續大恩餘。三殿褰珠箔。羣官上玉除。助陽嘗黍蕋。順節進龜魚。片露垂天酒。芝花捧御書。合丹同蠓蛭。灰骨共蟾蜍。今日傷蛇意。銜珠遂闕如。

奉和千秋節宴應制

五德生王者。千齡啓聖心。赤光來照夜。黃雲上覆晨。海縣銜恩久。朝章獻壽新。高居帝座出。夾道衆官陳。製杖洗清景。磬管凝秋旻。珠囊含瑞露。金鏡抱仙輪。何歲無鄉飲。何田不報神。薰歌與名節。傳代幸羣臣。

奉和賜王公千秋鏡應制

寶鏡頒神節。凝規寫聖情。千秋題作字。長壽帶爲名。月向天邊下。花從日裏生。不承懸象意。誰辨照心明。

張燕公集卷二

詩

奉和太行山中言志應制

六龍鳴玉鑾。九折步雲端。河絡南浮近。山經北上難。羽儀映朔雪。戈甲帶春寒。百谷晨笳動。千巖曉仗攢。皇心感韶節。敷藻念人安。旣立省方館。復置建神壇。扈蹕參天老。承榮忝夏官。長勤百年意思。見一勝殘。

奉和爰因巡省途次舊居應制

葱鬱興王郡。殷憂啓聖圖。周成會西土。漢武幸南都。歲卜鑾輿邁。農祠鴈政敷。武威稜外域。文教靡中區。警蹕干戈捧。朝宗玉帛趨。舊藩人事革。新禮國容殊。壁有真龍畫。庭餘鳴鳳梧。藜觴祝堯壽。合鼎獻湯廚。陽樂寒初變。春恩蟄更蘇。三者頒命服。五稔復田輸。君賦大風起。人歌湛露濡。從臣觀玉葉。方願紀靈符。

奉和過晉陽宮應制

太原俗尙武。高皇初奮庸。星軒三晉躔。土樂二堯封。北風遂舉鵬。西河亦上龍。至德起王業。繼明賴人雍。六葉啓昌期。再興廣聖蹤。傳呼大駕來。文物如雲從。連營火百里。縱觀人千重。翠華渡汾水。白日臨翠峯。粉榆恩賞洽。桑梓舊情恭。往運感不追。清時惜難逢。詩發尊祖心。頌刊盛德容。願君及春事。迴輿綏萬邦。

奉和度蒲關應制

蒲阪橫臨晉。華芝曉望秦。關城雄地險。橋路扼天津。樓映行宮日。隄含宮樹春。黃雲隨寶鼎。紫氣逐真人。東詠唐虞跡。西觀周漢塵。山河非國寶。明主愛忠臣。

奉和初入秦川路寒食應制

上陽柳色喚春歸。臨渭桃花拂水飛。總爲朝廷巡幸去。頓教京洛少光輝。昨從分陝山南口。馳道依依漸花柳。入關正投寒食前。還京遂落清明後。路上天心重豫遊。御前恩賜特風流。便幕那能鏤雞子。行宮善巧帖毛毬。渭橋南渡花如撲。麥隴青青斷人目。漢家行樹直新豐。秦地驪山抱溫谷。香池春溜水初平。豫歡浴日照京城。今歲隨宜過寒食。明年陪宴作清明。

奉和途中經華嶽應制

四嶽鎮皇京。中峯入太清。玉鑾重嶺應。緹騎薄雲迎。霽日懸高掌。寒空類削成。軒遊會神處。漢幸望仙情。舊廟青林古。新碑綠字生。羣臣願封岱。還駕勒鴻名。

奉和潼關口號應制

天德平無外。關門東復西。不將千里隔。何用一丸泥。

奉和過王濬墓應制

牛斗三分國。龍驤一統年。智高寧受制。風急肯迴船。有策擒吳嚙。無言讓范宣。援孤因勢屈。功重爲讒偏。舊跡灰塵散。枯墳古老傳。百代逢明主。何辭死道邊。